

*Es isch
zem
hyyle*



grindet 1975

Fasnacht 2016

Blaggedde 2016



Motto:
«Mer mache dicht»

Dr Fritzli sait im Eglisee
Ich bin e brave gsi – hesch gsee?
Zerscht hani s Baadhyybli gnoo
Haa jeeedes Heerli drunter doo
Denn bini ins Wasser gange – ganz sacht
Und haan e lange Brunne gmacht.
Dä tolli Schnitzelbangg – dä hani
Vor vyyle Joore gheret vom Zyttigs Anni
Ich haa däa gnoo – e weeneli studiert
Und denn dr Täggscht e bizz mutiert:
Dr Achmed sait vor em Eglisee
Ey Mann – my Ayshe isch bravi Frau– hesch gsee
I lueg über Muure und due Auge nit traue
Ai Maa sitzt uff Stuehl dört und sunscht numme Fraue
Bi Allah – halb blutt oder denn mit Bikini
Aber Ayshe was ganz bravi Frau isch myyni
Hett aa Burkini in Wasser und au an Sunne
Ey Mann – vo mir us kaa si au mache Brunne

Es isch zem hyyle




Willi an dr Fasnacht e Wurschtstand betryybe
Muessi e Gsuech an dÄmter schryybe
Denn griegi e Bewilligung, wies sich gheert
Damit sich jo au kaine draa steert
Au fir s neij Hyysli in myym Garte
Muessi uff e Bewilligung warte

Sogar wenni in dStadt muess mit mym Kaare
Dörfi nit ooni Bewilligung faare,
Machi us myym Büro e neije Woonig
Ooni Bewilligung goots nonig
Es git en Amt, das nimmt sich dämm aa
Drfir kaani denn e Bewilligung haa.
Au fir my Gartewirtschaft im Summer
Machi de Ämter e weeneli Kummer
E paar Tisch, e paar Stieel und scho nundefaane
Muess wider e Bewilligung aane
Vyyl wyter wämmers do nimme usfieere
Ooni Bewilligung kaasch numme no go demonschdrieere

Es isch zem hyyle





Basel kennt me uff dr ganze Wält
 Nach Basel kemme au Lytt mit vyyl Gäld
 Sygs dBasel World oder au an dr Art
 Gseet me die VIPs so ganz apaart
 In de beschte Hyyser dieen sie logieere
 Zwische dure au dur dStadt flanieere
 Au an dr Maischterfyyr vom FCB
 Kemme Lytt in dStadt, wänn dr FCB gsee
 Und denn no dFasnacht...

Dr Morgestraich in syynre Pracht
 Dr Cortège mit Wääge, Clique und Gugge
 E hailoosi Druggede uff baide Brugge
 Das isch Basel – das isch Lääbe
 Aber halt – was häämer no drnäabe?
 Lääri Stroose, lääri Gasse
 Lääri Baize, lääri Kasse
 Ai Laade nach em andere macht dicht
 Guet Nacht Basel – bald bisch Gschicht

Es isch zem hyyle

Tschau Sepp – jetzt hetts dr doch no glängt
 Si hänn di us dyym Ryych verdrängt
 Salu Michel – au du muesch goo
 Au du muesch jetzt dyy Plazz verloo
 Ihr deerfet jetzt nimm zooberscht throone
 Und das wääge deene zwei Millioone
 Zwei Millioone – e nätt Honorar
 Dr Grund drfür isch zwar nit ganz klar
 Villicht e nätt Gschänggli so unter Frinde
 Das verdeggt drmit e paar glaini Sinde
 Wär duet jetzt künftig preesidieere
 Und im FIFA-Hauptsizz residieere
 Wär heert sich gärn schnuure und kaa representieere
 Und sicher au mit Gäld jongliere
 Mir wüsste doo ebber – e Maa mit vyyl Gäld
 E integere Maa – e Maa vo Wält
 Im Constantin kennt me dFIFA aavertraue
 Är kennt denn dStadie grad sälber baue.

Es isch zem hyyle





Schineblooser Waggis



Es mienen mee Woonige aane do in Basel
 Mee Woonruum bruuchts – das isch kei Gfasel
 Mir mienen wider Lütt haa, wo guet diene verdieene
 Drum mienen mir si mit Woonige bediene
 Es mienen Woonige aane – deert bim Rankhof hetts Plazz
 Die Familiégärte sinn doch numme fir dKatz
 Wär will scho in so Gärte sizze
 Und bim Unkrutt jätte schwizze
 Mir mien in dZuekunft investieere
 Und au unseri Staatskasse drmit sanieere
 Jezz baue mr dHyysen uffe in dHeechi
 Wemmer sovy! Gränze hänn in dr Neechi
 Denn hätte mr Woonruum hoch uffe und grooss
 Wenn die Gärte nit wäre an dr Gränzacherstrooss
 So hett me plaant und ghofft bim BVD
 Es schyynt als kennt me dert nit gnueg gsee.
 Shett en Abstimmig bruucht und dBevölgerig hett gwunne
 Mir sizze jezz wyter in de Gärte und gniesse deert dSunne

Es isch zem hyyle

Aggsle an Aggsle – Rugge an Rugge
 Shett nit e mool me Plazz fir e Mugge
 Wäägeli, Koffer, deert no e Däsche
 Zmitts in de Däsche no e paar Fläsche
 Deert druggt sich aine mit Ruggsagg duure
 Griegt vo den andere fascht no aini uff dSchnuure
 Das isch däm glyych – är quätscht sich fiire
 Är will dr erscht syy an dr Tiire
 Är hebt syy Ruggsagg hoch in d Luft
 Deert drus uuse kunnt e bsundere Duft
 Es schmeggt nach Kääs – ain wo scho lauft
 Wo hett denn dää dä Stinggkääs kauft?
 En andere schreit do plezzlig uff
 He du Duubel – mach mi nit muff
 Stell die Gugge mit däm Gmies
 Gfelligscht uff dyni aigene Fiess
 Das isch e Bricht ganz ooni Tamtam
 Live vo Weil us em Achter-Tram

Es isch zem hyyle





Velofaare in dr Stadt
 Hei wie isch sVelofaare in dr Stadt doch glatt
 Kai Auto, wo dr Wääg vespeert
 Au in de Eibaanstroosse faare si verkeert
 Dr Rhyysprung dieen si aaberaase
 De Schugger mache si e langi Naase
 Bis diee nämmlig schalte, was die do mache
 Kaa me numme no driber lache.
 Si faare iber dBrugg uff und dervoo
 D Schugger luegen e numme no noo
 Ändlig sinn diee vvyile Auto duss
 Und blyybe zMuttenz oder zAllschwil uss
 Jetz gits numme no ebbis, wo dVelofaarer steert
 Aigetlig isch das doch unerheert
 Jetzt muess dr näggscht Regierigsrootsbschluss aane
 Kumm Hampe – mach vorwärts nundefaane
 Fir dVelofaarer wirds erscht richtig glatt
 In ere Fuessgängerfreie Innestadt.

Es isch zem hyyle

Duet di zBasel e Probleemli plooge
 Gits sicher en Amt, wo de kaasch nochefrooge
 DFraue, vos vor ihre Männer duet gruuse
 Kenne im Frauehuus go pfluuse
 Hesch ebbis verloore, muesch nit flueche
 Kaaschs im Spiegelhof im Fundbüro sueche
 Hesch dStell verloore – i dues dr verroote
 Dieen si di im RAV gar guet beroote
 Kaasch dKranggekasse nimme zaale
 Hälfe Verbilligunge bi ddyne Quaale
 In dr Gassekuchi e ginschtig Ässe
 Losst di e Momänt dyni Problem vergässe
 Wär am Änd vom Gäld zvyyl Monet hett
 Dämm sait dSozialhilfe dass es wyter länge sett
 DNotschlyffi kaa dir denn e Schloofplazz gää
 Wenn si dir sotte welle dy Woonig nää.
 Und diee wo sFiidle voll Schulde sott quääle
 Die löön sich aifach in Nationalroot wääle

Es isch zem hyyle



Mir dangge:

Drugg

fir dGstaltig

Fötteli

Inapa Schweiz AG

Grollimund AG

Susy und Esthy
em Larvemacher
de Schnidere

Krebs AG

sid 41 Joor drugge si die
scheenschte Zeedel

JasWag

em Schineblooser Benj

fir das tolle Babbyyr

fir s scheene Binde

fir die fyne Pointe



Angela und Daniela,
de Haut-Couture vo Basel



www.schineblooser-waggis.ch

Druckerei



Krebs AG

seit 1734

zBasel an mym Rhy



Mir sinn wider doo
 Jetzt sinn ihr alli froo
 Mir Schineblooser sinn aifach guet
 Sintrigiere ligt uns im Bluet
 Mir sinn Basel – mir hänn Basel gärn
 Mir sinn Basel – mir sinn Basel-Fan

Fasnacht an mym Rhy
 Und mir sinn derby
 Joor fir Joor am Waagebau
 Zeedel Goschdyym sinn e Schau
 Basler Fasnacht und mir sinn derby
 Basler Fasnacht und mir sinn derby

Wottsch e bsundre Raiz
 Goosch z Oobe in e Baiz
 Mir intrigiere queer dur dStadt
 E mängge Bebbi findets glatt
 Schineblooser jo das mecht i syy
 Schineblooser jo das mecht i syy

